

Kalaallit Nunatsinni atornerluisunut katsorsaannermut ilinniarfimmik pilersitsisoqarnissaanik Naalakkersuisut sulissuteqaqqullugit Inatsisartut aalajangiiffigisassaattut siunnersuut.

(ATASSUT-ip inatsisartunut ilaasortaaitai: Finn Karlsen, Siverth K. Heilmann, Knud Kristiansen)

Akissuteqaat

(Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisoq)

Siullermeerinnineq

ATASSUT-ip Inatsisartunut ilaasortaaitai: Finn Karlsen, Siverth K. Heilmann aamma Knud Kristensen Kalaallit Nunatsinni atornerluisunut katsorsaannermut ilinniarfimmik pilersitsisoqarnissaanik sulissuteqaqqullugit Inatsisartut aalajangiiffigisassaattut siunnersuuteqarput.

Inuiaqatigiinni atornerluinernik sunilluunniit akiuiniarnermut tunngatillugu suliassarujussuaqarput siunnersuuteqartunit oqaatigineqartut.

Siunnersuutip oqaasertaliornerani sumiginnaanermik, kinguaassiuutitigut kanngutsaatsuliornermik / atornerluinermik, naalliutsitsinermik, ilaqutariinni/angerlarsimaffimmi imigassamik ikiaroorartunillu atornerluinermik, pinnguaatinik pinngitsuuisinnaannginnermik il.il. nunatsinni katsorsaasarnissaq siunertaralugu nunatsinni atornerluisunik katsorsaasutut ilinniarfivimmik pilersitsisoqarnissaa pineqarpoq.

Tamatumunnga atatillugu Naalakkersuisut oqaatigissavaat ilinniartitaanikkut neqeroorutaareersut ilaat, alkologit ilinniartitaaneq imarissamigut atornerluinernik / pinngitsuuisinnaajunnaarnernik assigiinngitsunik, ass. imerajuttuunermik, pinnguarumatuujunermik, il.il. katsorsaannermik imaqaareermat. Ilinniartitaaneq DAC-mik (danish addiction counselor) taaneqartartoq Danmarkimi pisarpoq qaammatinillu 18-inik sivilissuseqarluni.

DAC-mik ilinniartitaanermi isumaginninnermi perorsaanikkut tunngaviit tunngavigineqartarput, tamatumani ilinniartooq eqqarsartaatsimut, paasinninnermut, misigissutsimut piumassutsimullu tunngaveqarluni periuseqarneq pingaartillugu katsorsaannermut ilanngutsinneqartarput. DAC ukiut qulit sinnerlugit nunatsinni oqartussaasunik suleqateqarsimavoq praktikernerillu ilaatitaasut taakku marluk ilinniartunut nunatsinneersunut tunngatillugu Nuummi Ilulissaniluunniit Qaqiffimmi pisarput.

Aammattaaq oqaatigineqassaaq perorsaasutut isumaginninnermilu siunnersortitut ilinniartitaanerni atornerluinermut- / pinngitsuuisinnaajunnaarnermut tunngasut – annerusumik minnerusumilluunniit - atuartsinertut pikkorissartitsinertulluunniit sammisatut ilaareermata. Taamaattumik pineqartoq ilinniarfinni eqqumaffigineqareerpoq.

Kiisalu oqaatigineqassaaq Isumaginninnermut Naalakkersuisoqarfik isumaginninnermut tunngasuni suliniutinik pisariaqartitsinermik qulaajaasussanik suleqatigiissitanik tallimanik pilersitsisimammat. Suleqatigiissitat suliassarisaat kinguaassiuutitigut atornerluinermut, qanitariinni timikkut tarnikkullu naalliutsitsinermut, inuunerissaarnerannut, ilaqutariinnut sanngiitsunut, kiisalu ajornartorsiutinut pinngitsuuisinnaajunnaarutaasartunut tunngapput.

Suleqatigiissitat suliasarsaanni sumiginnaanermik, kinguaassiuutitigut pinerliinermut/atornerluinermut, kiisalu timikkut tarnikkullu atugarliortitsinermut akiuiniarnermut katsorsaanermullu periarfissanik atortussanillu pitsanngorsaaneq, kiisalu piginnaasanik ineriartortitsinissamut periarfissanik pitsanngorsaaneq pillugit kaammattuuteqarnissaat siunniunneqarpoq. Taaneqartumut kingullermut tunngatillugu piginnaasaqarnerulersitsiniarnissaq siunertaralugu suleqatigiissitat ilinniarsimasunut ilinniarsimanngitsunullu ilinniartitseqqittarnernik pikkorissartitsisarnernillu sukumiinerulersitsinissamut periarfissarsiussapput.

Suleqatigiissitat nalunaarussiaat 2009-mi oktobarip naanerani naammassineqartussaq ilinniartitaanermut tunngasuni suliniutissatut siunnersuutininik, assersuutigalugu ilinniartitaanernik pikkorissartitsinernilluunniit nutaanik imaqassaaq.

Taamaalillutik suleqatigiissitat suliarujussuarmik aallartitaqareerput siunnersuullu siammasimmat Naalakkersuisut isumaqarput taama ittumik pilersitsisinnaanermut isummertoqannginnerani kaammattuutitut inerniliussassat utaqqineqartariaqartut.

Taamaattumik oqaaseqaatit qulaani taaneqartut tunuliaqutaralugit aalajangiiffigisassatut siunnersuutip akuerineqannginnissaa Naalakkersuisut inassutigisavaat.